

यूहन्ना की तीसरी चिट्ठी

3 यूहन्ना

1यूहन्ना की ओड़ तै: प्यारे ढब्बी, गयुस कै नाम जिस ताहीं मैं सत्य म्ह हिस्सेदार कै रूप म्ह प्रेम करूँ सूँ।

2हे मेरे प्यारे ढब्बी, मैं प्रार्थना करूँ सूँ के तू जिस तरियां आध्यात्मिक रूप तै बढ़ोत्तरी करण लागरया सै, उस्से तरियां तै ए सारे ढाळ तै बढ़ोत्तरी करदा रह अर सेहत का आनन्द उठान्दा रह।

3जिब म्हारे कुछ भाइयां नै मेरे धोरे आके सत्य कै बाबत थारी निष्ठा कै बारे म्ह बताया तो मैं भोत राज्जी होया। उन्ने मेरे ताहीं न्यू भी बताया के थम सत्य के राह पै किस तरियां चाल्लण लागरे सो। **4**मेरे ताहीं न्यू सुनण तै घणा आनन्द और किसे म्ह कोनी आन्दा के मेरे बाळक सत्य के राह का अनुसरण करण लागरे सैं।

5हे मेरे प्यारे ढब्बी, थम म्हारे भाइयां की भलाई म्ह जो कीमे कर सको सो, उस ताहीं बिश्वास कै गेल्या करण लागरे सो। हालाके वे लोग थारै खात्तर अणजाणे सैं! **6**जो प्रेम थमनै उन पै दिखाया सै, उन्ने कलीसिया कै श्याम्मी उसकी गवाही दी सै। उसकी यात्रा नै बणाए राक्खण कै खात्तर कृपया उनकी इस ढाळ मदद करणी जिसका समर्थन पणमेसर करे। **7**क्यूँके वे मसीह की सेवा कै खात्तर यात्रा पै लिक्कड़ पड़े सैं तथा उन्ने विधर्मियाँ तै कोए मदद कोनी ली सै। **8**इस करके हम बिश्वासियाँ ताहीं इसे लोग्गां की मदद करणी चाहिये ताके हम भी सत्य कै बाबत गेल काम करणीये सिद्ध हो सकां।

9एक चिट्ठी मन्ने कलीसिया ताहीं भी लिखी थी किन्तु दियूत्रिफेस जो उनका नेता बनणा चाहवै सै। **10**ओ जो कुछ हम कहवां सां, उसनै नीं मानैगा। इस कारण जै मैं आऊँगा तो बताऊँगा के ओ के करण लागरया सै। ओ झुट्टे तौर पै भूँडे शब्दां के गेल्या मेरे पै दोष लगावै सै अर इन बाततां तै ए ओ संतुष्ट नीं सै। ओ म्हारे बन्धुआं कै बाबत आदर मान कोनी दिखावै सै बल्के जो इसा करणा चाहवै सैं, उन्ने भी आंट लावै सै अर उन्ने कलीसिया तै बाहरण धका देवै सै।

11हे प्यारे ढब्बी, बुराई का नीं बल्के भलाई का अनुकरण करो! जो भलाई करै सै, ओ पणमेसर का सै! जो बुराई करै सै, उसनै पणमेसर ताहीं कोनी देख्या।

12दीमेत्रियुस कै बाबत म्ह हरेक किसे नै गवाही दी सै। उँरे लग के खुद सत्य नै भी। हमनै भी उसके बाबत म्ह गवाही दी सै। अर थम तो जाणो ए सो के म्हारी गवाही साच्ची सै।

13तेरे ताहीं लिक्खण कै खात्तर मेरे धोरे भोत सी बात सैं किन्तु मैं तेरे ताहीं लेखणी अर स्याही तै सब कीमे कोनी लिखणा चाहन्दा। **14**बल्के मेरे ताहीं तो आस सै के मै तेरे तै तावळा ए फेटूंगां। फेर हम आम्मी-श्याम्मी बात कर सकागे।

15शान्ति थारै गेल्या रहवै। तेरे सारे ढब्बीयां का तेरे ताहीं नमस्कार पहोच्चै। ओड़े म्हारे सारे ढब्बीयां ताहीं निजी तौर पै नमस्कार कहणा।

नोट्स
